



Jumat, 27 Desember 2024
Ogen: Perb. Rasul 20:35



"Malem Ate Mere"



Pengalaman penulis kerna mere seh ku bas umur 49 tahun, melala erbagena; saja si pasti maka tupung kita banci mere (labo terjeng materi saja ngenca tapi pe mere pusuh dengen perukuren), lit kemalemen ate bas diri penulis. Mere labo erkiteken litna bas kita, tapi sigejapken maka adina si sampati teman-teman guna banci lepas i bas perbebenna nari jadi sada keriahen. Sekali jadi lit piga-piga perpulungen (benana kal labo sitandan tapi kenca ercakup-cakap, kepeken ia tading bas sada-sada Runggun). Pemenana kami jumpa, posisi ekonomi labo kal sikapna (masa Covid-pergerakken seh kal terbatasna). I bas perjumpa kami terjadi me percakapen; inti percakapen maka erkiteken covid lanai lit uang masukna, emaka nina piga-piga perpulungen ndai "ras kita tading i rumah enda". Arih-arih kami bas jabu, kesimpulen perarihen kami maka perpulungen e tading ras kami (kurang lebih 10 kalak). Masa-masa sulit ibentasi kami, seh maka covid berakhir, jenari si 10 kalak ndai mulihken ku kutana sekalak-sekalak. Mere i bas masa sulit jadi sada pengalaman kiniteken si luar biasa kel erkiteken reh tergejapna pengkawali Dibata kempak kegeluhenta.

Bahan renungenta wari enda pe si tersurat i bas kitab Perbahanen Rasul-rasul 20:17-38 khususna ayat 35 ngatakan "malemen kap ate mere asangken ngalo". Pedah enda sehken Rasul Paulus man pertua-pertua si lit i Epesus, terkhusus ayat 35 ngerana Paulus kerna mere e me kap sada kemalemen ate. Pengalaman Paulus i bas ndahiken dahin Tuhan pe, mereken dirina, pusuhna rikut pe ras waktuna alu ukur meriah. Rasul Paulus nggo mereken usihen man kerina perpulungen i Epesus kerna kinijingkatn bage pe mere alu kemalemen ate. Tuhan Jesus pe pernah ngatakan man ajar-ajarNa: sangapen kap kam mere asangken ngalo. Kata enda pe seh man banta kerina moria-moria. Sangaplah siakap man banta adi lit denga kesempatan lako nampati teman-temanta; mpenahangi baban simberat bas diri teman-temanta.

✎ Malem ate adi lit kesempatan lako mere